

REGIONAL NEWS

LADC

Thla thar December ni 3-a Lai Autonomous District Council inthlan lo awm turah Party hrang hrangte ngawrh takin an campaign mek a, naktuk thawhtanni tlai dar 4 atanga vote thlak ni December ni 3 tlai dar 4 thleng Silent Period puan a ni.

Lai Autonomous District Council LADC inthlan lo awm turah hian Lawngtlai DC District Election Officer ni bawk Pu Donny Lalruatsanga chuan hriattirna tichhuakin inthlanna muanawm, thianghlim leh felfai a awm theih nan naktuk tlai dar 4 atanga inthlan ni tlai dar 4 thleng chu Silent Period atan a puang a, hemi hun chhung hian mimal emaw, pawl emaw, Political Party ang emaw a he inthlan kaihhnawih a Lai Autonomous District Council pawn lam atang Campaign kaihhnawih - vantlang punkhawm huai hawt leh neih emaw aurinna hman emaw phal ani tawh lova, LADC Area an chhuahsan vek tur anih thu a sawi a ni.

Member 25 awmna Lai Autonomous District Council (LADC) inthlan lo awm tur atan a inbuatsaihna kal zelah hian District Election Officer Pu Donny Lalruatsanga chuan inthlan buaipui tur Official ten Vote an thlak ah, diktak a Vote thlak chu an ngai pawimawh hle tih sawiin, Official zawkte thil diklo leh rinhleh theiha an awm theihna remchang awm thei apiang chu a theih ang anga en ulukin ruahmanna siam a ni tih a sawi.

Polling Party, hmun hla zawk pan turte chuan naktuk hian Lawngtlai an chhuahsan dawn a, Campaign theih hun pawh naktuk tlai dar 4 ah a tawp ang.

<><><>

REV C.ROSIAMA AWARDED DOCTOR OF DIVINITY

Mizoram Presbyterian Kohhran pastor pension Synod Moderator hlui Rev. C. Rosiama chu Serampore College-in Honorary Doctor of Divinity a hlan a.

Rev. C. Rosiama hian Mizoram Presbyterian Kohhran hnuaiah kum 32 chhung pastor hna a thawk a. Pastor bial vawngtu a nih bakah Synod leh Presbyterian Church of India General Assembly thlengin rawngbawlna pawimawh tak tak a chelh tawh a, Synod Moderator leh Senior Executive Secretary bakah, Mizoram Synod hnuaiah puipa nihna a chelh kim vek tawh bawk a. Aizawl Theological College-ah Acting Principal a ni tawh bawk a ni.

Rev. C. Rosiama hi Christian Counselling lama Master of Theology hmasa ber a ni a. Mizoram Synod in a din Family Guidance & Counselling Centre bul tantu a ni a, he centre hi amahin kum 3 chhung a enkawl a ni. Rev. C. Rosiama hi Bible Society of India-ah ram puma Vice President pathumna chanvo pawh alo chelh tawh a ni a. Bible lehlin bikah tunah hian BSI Aizawl Auxiliary-ah CL-Revision-ah Chief Translator a ni mek bawk a ni. Doctor of Divinity dawngtu Rev. C. Rosiama chuan chawimawina chu Kohhran ho zar a nih thu sawiin lawmawm a tih thu Akashvani a hrilh a ni.

<><><>

CHAMPHAI NGOCC

Champhai NGO Coordination Committee chuan Chief Minister chu Champhai hmuna Mizoram State University Eastern Campus dah a nih theih nan a hma la turin an ngen.

Chief Minister hnena Nilaini kaltaa lehkhah an thehluhah Champhai NGO Coordination Committee chuan Champhai chu Mizoram khaw lian ber pathumna ni mekin khawchhak lam nen insumdawntawwna hmunpui a nih thu leh border trade-ah pawh sorkar laipuiin a ngaihpawimawh khua a nih thu an tarlang a. Govt. Champhai College pawh Mizoram college hlun leh upa pawl, Mizoram State College -a upa ber dawttu kum 1971-a din a nih mai bakah khawchhak lamah chuan College changlung leh Campus nei tha ber tia chhal theih hial a nih thu an sawi a. Mizoram State University a lo din dawn takah chuan Govt. Champhai College chu tichanglungin Eastern Campus dinna remchang tak a nih mai bakah mamawh a ni tel hial zawk tih an tarlang a. India sorkarin Look East Policy atanga Act East Policy a kalpui atangin khawchhak lam nen inlaichinna tha zawk Act East Policy behchhanin khawchhak lam nena insumdawntawn nan thil pawimawh tak Centre for International Business chu a din theih dawn bawh tih tarlangin hei hi College Undergraduate course BBA te nen siamrem awlsam leh tha tak tur a ni an ti.

Champhai NGO Coordination Committee hian kumin February ni 19 khan Mizoram Sawrkarin Mizoram State University a din thar tur chu Champhaiah dah turin Chief Minister hi an lo ngen tawh a. Tun hnaiah Mizoram State University Lungleiah dah tum a nih thu Chief Minister in a puan avangin Mizoram State University Eastern Campus chu Champhaiah dah turin an ngen ani.

<><><>